

بيرق أحزاني

سعيد الوهيبي

جيتني وأنا اعترف لك م البدايه..
بيرق احزاني نصب فالقلب رايه!!
ادري انك ما لفيت الا لعيني..
بس نهري جف ما لك فيه حايه!!
وادري انك امنيات لكل عاشق..
وادري انك للحسن والطيب آيه!!
وادري انك..وادري انك..وادري انك..
غيمتك ما جات الا في سمايه!!
بس داري "يا وليفي" وانت داري..
المحل فيها بما فيه الكفاية!!
لو تشوف البرق يلمع في سماها..
لا يغرك طيف عابر للنهايه!!
ارسم الضحكة على وجهي واكابر..
والحزن يمسح ويهدملي قوايه!!
وازرع الرياحان في ارض التجارب..
علني القى من العالم جزايه!!
الراوية دايمًا، تبدأ بسيطه..
بس وين اللي فهم معنى الروايه??
خلنا نحلم لعل الحلم يصدق..
قبل ما يعزف علينا العشق نايه!!
اكتبك للبعد..للتجريح..لاني..
مالي اصلا «في طريق الحب غايه!!
انت راجع في قصيدي كل جملة..
واذكر ان لي قلب ما لك فيه حايه!!



مطر البريكي

سالفة غيَّاب

الله لنا مادامك انتي والهموم أقراب
وش يطلع بيدي وانا مصلوب في عينك؟
لو كان لي حيله وادوج خطوتي للباب
ماشفتني بين الحنايا ناثر طينك!!
شوفي كثير اللي بقى لي وغاب ذا اللي غاب
بس قولي انتي وينهم من قلبي ووينك!
أحنّ لك عين السجين لطلّة الأوصاب
واشتاق لك كثر انحاء الورد ليمينك
وانتي عرفتيه انكساري دون ذكر اسباب
طوّعت لك طير الحشا رفر على يديك
ماهمني عمق الوجع في شهقة الأحداب
ولاحدني عنك الشتا والقحط ف سنينك
كذاب لاقلت أكرهك كذاب ثم كذاب
لكن تصنّعت الجفا لجل أخضع جبينك
مريتها كل الشوارع (سالفة غيَّاب)
حتى الغصن قام اشتكى من عجرفة تينك
إنتي هنا مثل الحطب مارق للحطاب
وانتي هناك الفاس قطع بيني وبينك
(الصبر زين!) ولي متى دونك تطيح رقاب؟
نبضي ودمي ياغلا هالروح معطينك
ودامك غديتي والهموم المثخنه أقراب
وش يطلع بيدي وانا مصلوب في عينك!؟